

## **PIRIMON**

### **Poru Gigirum Meuma Pirimon Menan Tenewa**

<sup>1</sup> Poru, Iesu Keriso oya nog abnawa, ge nu gwanunwa Timoti apa onne Pirimon me nu evunwa nonunmagawa nau desiroma abnawa.

<sup>2</sup> ✧Sira nu yogiyunwa Apia, nu mut abnawa desiroma Arukipas, sira siosi me gwe geuma danave wakenewa mu gumbo onne.

<sup>3</sup> Mamunwa God sira Ayapan Iesu Keriso gumbe God ano oraiwa ge yum ye guniyap wakeigimpe.

#### *Gaun Ge Nun*

<sup>4</sup> Ne nun neuma danave genan anoeni, sira God neuma gumbe kum evedni gaun veni.

<sup>5</sup> Kuyawa ne anona anotumat geuma me Ayapan Iesu oya sira baigan geuma iyayapan iyakaisi igiyawa munan.

<sup>6</sup> Ne imunap, ge yaimoyai yaug anoa dividivi oraiwa me Keriso oya etewa, sira ne imunap ge anotumat gumbe baigan toboratanwa me yusipamit ag yaipe.

<sup>7</sup> ✧Gwanen, nu baigan geuma gumbe degadega kokavitwa ge watmemeyam kokavitwa tuntu, kuyawa ge iyayapan iyakaisi nonowa yusiwa munana.

#### *Poru Gaiyawa Onesimas Oya*

---

✧ **1:2:** 1Ko 4:17; 2Ti 2:3    ✧ **1:7:** 2Ko 7:4

<sup>8</sup> Ne oma ane divi atan oya yusipamit dirukna Keriso gumbé.

<sup>9</sup> Megara ne imunap baigan gumbé nun genan watna. Ne Poru tayawa da, sira gare mame Iesu Keriso oya nog abnawa eni.

<sup>10</sup> ✧ Ne nog danave wakeeni kumiwa apa utunwa Onesimas\* barauna. Me oya ne imunap genan nun watna.

<sup>11</sup> Namu me oma den ane nau genan ane, megara gare me oma ane ge ge nenan nau ape.

<sup>12</sup> Ne me genan baraueni taig gungap onivi. Me nonenmagawa di.

<sup>13</sup> Ne gae oraiwa oya nog danave wakeeni kumiwa apa, ne me aupopo gunap wakepa genanwa oya nau apa.

<sup>14</sup> Megara ne yaug anona divi da gwangap den atna. Kuiyawa baigan oya bira da yusipamit den dirukpe, megara ge nonegmagawa gumbé a.

<sup>15</sup> Me dud kum koni kusi da gungap painau aig wakene. Ne anoeniwa, natawa me anten ge me sira taig aug gungap wakeigimpe yaibobot viripusiwa onan.

<sup>16</sup> ✧ Gare me ankwatave nau aivi abnawa mina onan, me ankwatave nau aivi abnawa egavewa, nu gwanunwa nonunmagawa. Me natawa, ne gunap, sira anoeni me di egaviren ge gungap, kwapiwa gumbé sira Ayapan gumbé.

<sup>17</sup> Ge yaug anoa ne evegwa oraiwa ipewa, ne baigan negege mina me baiganiya.

---

✧ **1:10:** 1Ko 4:9,15      \* **1:10:** Me Pirimon ankwatave nau aivi abnawa, sira me Iesu gumbé anotumat aune Poru gumbé.

✧ **1:16:** 1Ti 6:2

<sup>18</sup> Me ge watkukam gennewa, sira garawa gentanit di, me oya wa anotna.

<sup>19</sup> Ne Poru naninap gigirum mame teeni. Ne garawa me oya gentna.

—Gare mame wakewake geuma ne gunap onne, megara me oya ne divi da den watna.—

<sup>20</sup> E, ne evenwa, ne imunap Ayapan gumbe garawa ge gungap autan anoeni. Ne nonenmagawa yusiwa Keriso gumbe wana.

<sup>21</sup> Ne anotumat eniwa ge nonwa auwa, meoya gigirum mame genan tena. Kuiyawa ne yaug anona, ne ano veniwa me kusikaren go ge awa me kokavit.

<sup>22</sup> ✧Da sira, vintan arawa tamibarip nenan aya. Ne anotumat eni nun yeuma gumbe ne oma ane guniyap onetna.

<sup>23</sup> ✧Epapuras me ne gaibu nog abnawa Keriso Iesu oya, me kaiwa guniyap waivi.

<sup>24</sup> ✧Ne nau desiroma Mak, Aristarukas, Demas ge Ruk mu kaiwa guniyap veme.

<sup>25</sup> Ayapan Iesu Keriso ano oraiwa meuma guwewa gaibu wakeigimpe.

**GAE MATAIWA**  
**The New Testament in the Maiwa language of Papua**  
**New Guinea**  
**Nupela Testamen long tokples Maiwa long Niugini**

copyright © 2011 Wycliffe Bible Translators, Inc.

Language: Maiwa

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-08-30

---

PDF generated using Haiola and XeLaTeX on 18 Apr 2025 from source files dated 31 Aug 2023

45dcb14f-9541-5013-8907-63bcfabcd6b5